

## **KUM THAR NÎ (January 1, Pathiann\$)**

Kum khat chhûnga ni pawimawh kan hman hmasa ber chu Kumthar Nî hi a ni. Kum 2023 chhûnga ni 365 zînga ni hmasa berah hian Kohhran hote'n he ni min hruai thlengtu Pathian hnenah lâwmthu sawi ila. A duh zâwnga ke kan pên theihna turin mahni theuh inhlan tharin, a hruaina i dîl ang u.

Mizoram Kohhrante'n eng hun lai aţang chiah khân nge Kum Thar Ni hi kan hman ţan tih chhui chhuah hleih theih a ni tawh lova. Kan Missionary hmasate kaihhruaina hnuaiyah hun eng emaw ti aţang khân kan hmang chho ve ţan a. A tir lamah chuan tun ang hian urhsun takin an hmang lêm lo nia hriat a ni. Hun a lo kal zêl a, mi thinsungah ngaihhlutna lo sâng zêlin kan hmang hlung tial tial a. Pathian hnêna lawmthu sawina inkhawm leh intihhlimna nî atâna hmangin, thingpui leh chhang ruai nên kan lâwm a; ran talha ruaipui nêna hman thlengin kan lo chîng chho ta zêl a ni.

Ni leh thla, kum te hi a pumpuiin a siamtu leh neitu dik tak chu Pathian a ni. Hun liam tawhte kha Lalpa duh zawngin kan lo hmang tawh lo mai thei, thil ţa lo leh sual rawngbawl nan hmangin Lalpa kan lo tilungngai tawh ţhin a nih pawhin, He kum thar hi chu Lal Isua Krista rawngbawl nan leh a duh zawng tih nan hman theuh i tum ang u.

Kum khata ni hmasa ber kohhranin kan ngaihlu a, ni pawimawh anga kan serh leh Pathian chawimawina hun atâna kan hmang hi kan tih-âwm tak leh min hruaitu Pathian lawm zâwng tak pawh a ni ngei ang. Chuvângin kohhran hote'n urhsun takin hmang ila. Kan hlima kan lâwm tlan theihna ber tur thlîr chungin programme pawh uluk takin i buatsaih ang u. He kum tharah hian kan lâwmna entîr nân kan unaute tân thil ṭha eng emaw tâl Pathian hminga intihsak tawn kan tum ṭheuh dâwn nia. Thufingin, “A bul ṭan ṭhat chu a zatve zo tluk kan ni” a tih angin, bul ṭan ṭhat i tum ṭheuh ang u.

**MISSIONARY DAY  
(January 11, Nilainî)**

**Thupui : Chanchin Tha hi hril rawh u  
(Mk 16:15)**

Vawiin Missionary Day hi Mizoram Sawrkârin Missionary Day hming puttîra ram pûm huap chawlh (State Holiday)-a a puan kum 35-na a lo ni ta reng mai. India hmarchhak tlângram chhengchhe tak kara cheng hnam mawl leh kawlhse tak, ramhuai hlau êm êm òin te, an chheh vêla hnamte tibuai a, tirâlkhel òin Mizo hote hnêna Chanchin Tha hril a òlzia hria a, chu hna khirkhân tak phur chhuak tura mi inpe Sap tlangvâl pahnih, Frederick William Savidge (Sap Upa) leh James Herbert Lorrain (Pu Buanga)-te'n Arthington Aborigines Mission tirha Sairâng an lo thlen ni Missionary Day hi Mizorama cheng tawh pawt tân chuan nî ropui leh lawm tlâk a va ni em!

Anni pahnih hi ram buai a nih avânga an tum hun takah Mizoram lo lut thei lo mah se, December 26, 1893-ah Sawrkâr phalna fel tak hmuin lawnga Tlawng lui rawn zawhin, January 11, 1894-ah Sairang an rawn thleng a. Anni pahnih hi kan rama Isua hming rawn lam ri hmasa bertute chu an ni kher lo ang. Amaherawhchu, Mizote hnêna Chanchin Tha hrîl a, a theih chen chen châm chilh inhuama lo chhuak hmasa berte an nih avângin min chên chilh reiin sulhnu min hnutchhiah nasa hlê rêng a. Mizorama lo chhuak Missionary dang zawng zawng aiin kan ram leh hnam tâna an hnathawhte a ropuiin, hriatreng

tur thil tam tak an hnutchhiah nasa êm êm bik a ni. Tin, anmahni hmangaihtu tak takte an nihzia hria a, Mizote'n Zosap tia hming an pêk chu hminga putu hmasa berte an ni bawk.

Mizoram tâna an hlutzia hria a, Kohhran lian pahnih, Mizoram Baptist Kohhran leh Mizoram Presbyterian Kohhrante'n Sairang a, Mizoram leilung an rawn rah ãan ni January 11, Sawrkar chhuṭi nî atâna puang tura an ngenna Mizoram Sawrkar-in rem tihsak a, kum 1989 atanga hman ãan turin State Holiday atâna hemi nî min lo puansak hi a lawmawm êm êm a ni. Tu te emaw chuan kan ramah hian Chanchin Ṭha thu hi lo sawiin Isua hming hi an lo lam ri tawh pawh a ni ang e, mahse, January 11, 1894 atanga kan rama Pioneer Missionary-ten Chanchin Ṭha chi an rawn tuh chuan nghet taka zung kaihinh khawvêl awm chhûng zawngin kan ram a chhuahsan leh tawh ngai lo vang.

Vawiinah hian heng Pioneer Missionary pahnihte chauh pawh ni lovin, Chanchin Ṭha avânga an sulhnu rawn chhuitu kan rama Zosap Missionary lo kal zawng zawngte pawh kan ngaihluin kan hre reng a. Anmahni avângin Pathian hnênah lawmthu i sawi thar leh ang u. Missionary Day hi tu Kohhran ta bîl mah a ni lo va, Mizote leh Mizorama cheng zawng zawngte tâna Nî ropui leh lâwmna nî a ni e. Missionary Day chibai vek ule.

**PHÂR PUAL PATHIANNÎ  
(January 29, Pathiann\$)**

**Thupui : Phar te tithianghlim ula (Mt 10:8)**

India ram hi khawvêla phâr tamna ber ram a ni a. Phâr zînga rawngbâwlina bul inçanna pawh a ni. Tunah chuan khawvêl ram 51-ah The Leprosy Mission (TLM) chuan rawngbâwlin hma a la ta a ni. Irish tlangval Wellesly Cosby Bailey chuan India rama phâr khawngaihthlak tak tak, enkawltu ðha leh awmna hmun mumal pawh nei lo, hmun remchang laia an dah khawm mai mai, ngaihsak pawh hlawh lote a hmuhin a khawngaih êm êm a. Chûng mite rawngbâwlsak chu a thinlungah Pathian hna ðul ber nia ngaiin, kum 1874-ah India rama khaw pakhat Ambala(Haryana State) khawpuiah harsa takin bul a ðan ta rawih a. Hei hi khawvêl pûm huapa phârte enkawl tura pawl din hmasa ber a ni. Tunah hian India rama phâr tamna State 10-ah Hospital te, Mercy Home te, Vocational Training Centre leh Community Based Centre-te hmangin rawngbâwlina kalpui mêk a ni. India ramah hian TLM chuan phâr enkawlina Hospital 14 a nei mêk a. Phâr dam lehte eizawna tur zirtirna Vocational Training Centre 6 leh Mercy Home 5 a nei bawk.

TLM rawngbâwlina-a BCM kan inhman ðanna chu July 1, 1975-ah Rev. KD Siamliana-te nupa, Bhutan ram

East Mongar-a kan Missionary-te Phêr Damdawi In-a an thawnha kha a ni. Hun inher danglam leh Sawrkar tharah kal phung thar tam tak a lo chhuah tak avângin, Mizoram-a The Leprosy Mission Trust rawngbâwlna chuan a kal zêlnaah harsatna tawkin, ram chhûng leh ram pawn aţanga ţanpuina sum chet vêlnaah kalpui zêl rem lohna chin a lo awm ta a. Amaherawhchu, Phêrte zinga rawngbâwlna chu chawlhsan mai lova chhunzawm zêl a nih theihna turin The Leprosy Mission Mizoram chu kum 2017-ah khân din a lo ni leh ta a. Tunah hian Bethany Colony Leprosy Association (BCLA)-te nena thawk hovin, Andra Pradesh State-a Guntur District chhûnga Bapatla khuua phêr enkawlna hmun (Colony), India rama phêr enkawlna hmun lian berah TLM Mizoram chu a bung chhunzawm ta zêl a. Hetah hian phêr 1200 vêl zet enkawl mêk an ni a. Hei bakah hian Mizoram chhûnga phêr natna veite zawn chhuah leh enkawl a, tisa leh thlarauva chhanchhuah leh chhawmdawl hna thawh zêl hi TLM Mizoram-in a tum chu a ni.

Phêr Pual Pathian nê atân TLM chuan January thlaa Pathian ni hnukung ber hi a hman thîn avângin BCM pawhin he nê hi tidanglam lovin a hmang zui ve ta zêl a. Hemi ni a thawhlawm pawh TLM rawngbâwlnaa hman turin BCM Hqrs. Office-ah thehluh tur a ni a, Aizawl leh Lawngtlai Area-a awmte'n E.S Office kaltlanga pek tur a ni e.

**BAPTIST WORLD ALLIANCE NĪ  
(February 5, Pathiann\$)**

**Thupui : *BWA atangin siam a ni ang.***

Khawvel pûm huap Baptist Kohhran Inzawmkhawm Pâwl (Baptist World Alliance-BWA) hi kum 1905, July ni 17 khan London khawpuia Exeter Hall-ah, khawvel ram hrang hrang ațanga palai 3500 vêl kalkhawmin an din a ni a. Baptist Kohhran hi khawvêl hmun hrang hrangah awm darh mah se, Lal Isua thupek, ram tina kala Chanchin Țha hrilh hna ngai pawimawh kohhran an nih avângin sawt zawka rawngbâwl tura thawhhona leh inpumkhatna Țha tak neia khawvêl pûm huapa rawngbâwl duhna lian tak an nei a.

Chutianga inzawmkhawmna pâwl a lo awm theihna tura sulsutu leh Țahnemngai taka hma latu eng emaw zat awmte zîngah BWA din chungchânga mimal thawh hlawk leh hmingthatna khumtu bera an ngaih chu John Newton Prestridge a ni. A chanchinbu siam ‘*The Baptist Argus*’ (1897)-ah khawvêl huap Baptist inzawmkhawm (congress) neih a Țul thu a sawi nasain, mi tam tak ngaihtuahna a chawk tho ta a. Tichuan, October 4, 1904-a America leh British Baptist hruaitute inhmukhawm chuan July 17-19 1905-ah Pan-Baptist Conference, London khawpuia neih chu an rêl tlu ta a. Congress buatsaih tura a Țul apiang lo ngaihtuah turin member 60 awmna British Committee an din nghal a. Congress

tan hmain he Committee hian London khaw chheh vèl hmun hrang hrangah District Meeting vawi 12 lai an neihpui hman a ni.

Hêng hun lai hian rawngbâwl tura Kohhran inzawmkhawm thar an awm neuh neuh bawk a. Hei hian Baptist hote rilru pawh inzawmkhawm turin a nawr chak hle bawk. Tichuan, Congress vawi khatna chu hlung taka neih a ni ta a. He Congress hi Pathian thu sawi thiam leh hrilhfiah thiam hmingthang Scottish mi Dr.



Alexander Maclarena'n kaihhruaiin BWA chu a lo piang ta a. Hruaitute pawh thlang nghalin President atân London mi, John Clifford leh Secretary atân mi pahnih, Dr. JH Shakespeare leh Dr. JN Prestridge-te thlan an ni. BWA thupui atân, '*Lalpa pakhat, Rinna hmun khat, Baptisma hmun khat*' (Eph.4:5) tih chu hman a ni a. Constitution mumal tak siamin, '*BWA hi khawvêl pûm puia Baptist Kohhran zawng zawng hi, Pathianin Isua Kristaa thil engkim fawkkhawm a tum tipuitling tura rinawm taka thawkho tur leh, khawvêl pûm pui hi Krista ta a nih theih nâna thawkho tura din a ni*' tiin a dinchhan tarlan a ni.

Tunah hian khawvel ram hrang hrang 128 ațanga Baptist Denomination 245 awmin member 49,000,000 an awm a, Tualchhung Kohhran ngawt pawh 1,73,000 chuang an ni. BWA hian Falls Church, Virginia, USA ah Headquarters neiin, kum 5 dan zelah Inkhawmpui lian a huaihawt thin a. BCM pawh kum 1978 ațang khan BWA member lo ni ve tawhin, Inkhawmpui lianah palai leh Zaipâwlte a lo tîr ve tawh thin a ni.

**MISSIONARY THLEN CHAMPHÂ**  
**(March 8, Nilain\$)**

**Thupui : Thil tha chanchin lawmawm thlentute ke chu a va mawi em! (Rom 10:15; Isaia 52:7)**

March 8, 1903 hi a ÷um hnihna atâna Mizorama Pioneer Missionary-te pahnih, Sap Upa leh Pu Buanga ten Mizoram an rawn chhuah lehna nî a ni. An rawn kal hmasak khân Silchar lam atanga lo chhovin Tlawng lui an rawn zawh a. Sairang kaih lo chhukin Mizoram leilung an rawn rap tan a. Chumi nî chu Missionary Thlen Champha(Missionary Day) tiin Kohhran mai ni lovin, Mizoram Sawrkâr meuhin State Holiday-ah a puang a ni tih kan hre ÷heuh awm e. BCM bikin kan ni pawimawh pakhat atâna kan serh leh thawktute chawlh atâna kan puan March ni 8 nî hi chu, BMS tirha Mizoram chhim lama rawngbâwl hna thawk tura, a vawi hnihna atân kan ram leilung rawn rap leh a, Tlabung kai an lo thlen nî a ni thung a. Hei hi nî pawimawh leh hriat reng tlakah BCM chuan a ngai a ni.

BCM Assembly 1989 chuan Lunglei an lo luh nî, March 13 chu, ‘Chhim lama Missionary-te thlen ni’ tia hman turin a rêl a. Kum 1990 atang chuan BCM Office-a thawktute tân chhuñi nî-ah hman a ni. Tualchhung Kohhranah erawh chuan inkhawm programme pawh siam a ni chuang lo. Kum 1996 Assembly-ah hei hi ngaihtuah

that leh niin, Tlabung an thlen nê hi chhim lama BMS Missionary-te lo thlen nê atân hman zâwk ni rawh se, tiin a rêl leh ta a. Tichuan, kum 1997 atângin March ni 8 hi kan lo hmang leh ta zawk a ni.

Sap Upa leh Pu Buanga te hian Chhim lamah Baptist Kohhran tam tak an phun a, Zirna In leh Damdawi In te, Sunday School te, Book room leh Printing Press te, Bible lehlin, Mizotawng Dictionary siam, Nau hnuchham enkawlna, Tirhkoh leh Pastorte la in tuna Baptist Church of Mizoram lo nita hi an rawngbawlna rah chhuah liau liau a ni. Baptist Missionary Society London chungah leh Kan Zosapte chungah hian bat tam tak kan nei a ni. He ni, Missionary thlen champha hi a hluin a ropui em

avangin Kohhran ho ten Zosapte kan rama rawn hruai luttu Pa Pathian hnena lawmthu sawi nan i hmang theuh ang u.

Kohhranhote'n kan Pioneer Missionary-te rawngbâwlna hi kan ngai pawimawhin kan hlut thiam sawt hlê mai a. Tlabung tuipui kama Missionary-te rawn kaina hmunah anmahni hriatrengna In ðha tak sain, helai hmun hi 'Missionary Kai' tia vuah a ni ta nghe nghe a ni.

*'In hotu, Pathian thu lo hrilhtute che u chu hrereng ula, an awm dana thil chhuak chu ngaihtuahin, an rin dan zir rawh u' (Heb.13:7)*

**TUMKAU PATHIANNÎ**  
**(PALM SUNDAY)**  
**(April 2, Pathiann\$)**

Khawvêl pûm puia kristiante țana ni pawimawh, Lal Isuan chhandamna hna a thawhna lam nena inkaihhnawih hnai zual bik ni pathum kan neihte chu, Palm Sunday, Good Friday leh Easter Sunday-te an ni a. Hêng hun pawimawhte hi kohhran hote'n țha kan tih anga programme siamin kan hmang țhin a ni. Eng tik lai ațangin nge Palm Sunday hi Kohhran hote'n an lo hman țan tih hi hriat theih a ni tawh lo va. Khawchhak ram Kristiante chuan kum zabi 4-na lai vêlah khân an lo hmang țan daih tawh a; khawthlang ramte chuan kum zabi 8-na vêlah an hmang țan nia hriat a ni bawk.

Kan hriat țheuh angin Tumkau Pathian Nî hi Lal Isua Jerusalema lal a nih anga a luh nî hriatregna a ni a. Hun dangah hetiang taka mipui vântlâng lawm leh chawimawi a hlawnha hi hriat tur a awm lo. Lei leh vâna Lalber ni mahse, leilunga hun a hman chung tawi têah rethei tak leh lunghahna pawh nei lovin, itsîk leh elrelna te, hmuhsit leh endawng-te tawkin, kawng harsa leh khirh khan tak tak a zawh a. A tawpah mualpho taka kross-a khenbeh a ni. Chutiang kêra Lal a nihzia puanchhuahna leh Jerusalem-ah ropui taka lut a, mipui tam takin an lo chawimawina hian, a hnu lama kohhrante thinlungah thu

a sawi thuk êm êm a. Khawvêl ram tina kristiante chuan inzir chhawng zêlin he nî hi Lal Isua hnêna chawimawina hlan hun atân an hmang chhunzawm ta zêl a ni.

Kan hun hman dânte inang vek lo mah se, Mizoram ringtute pawhin ni pawimawh leh Lal Isua chawimawina ni bik ang hialah kan ngai ta a ni. Hmun tam takah chuan kohhran mite'n naupang ațanga puitling thlengin khawlai fangin kawng an zawh țin a. 'Hosana' tia ring tak taka au rualin, Tumkau leh Pangparte an keng a, fakna leh chawimawina hla an sa tuar tuar țin a ni. Tumkau Pathian Ni a Zingara Kristian Naupang pawl leh an hruaitute Kawng zawh a an au rual thin hi duh tawk mai lovin, Kohhran mipui a tam thei ang ber tel ve thei țin ila a lawmawm hle ang.

Vawiinah pawh hian, Zing leh zan lam Thuhrlitu leh Kohhran zaipawlte leh Kohhran mipui zawng zawngte'n ținahnemngai leh uar takin Lal Isua Lalna hi puang chhuak thar leh ila, i chawimawi nawn leh ang u.

**GOOD FRIDAY**  
**(April 7, Zirtawpn\$)**

Kum tinin Good Friday hun lo thlen nî (tahrik) hi a danglam ðhin a, Kut sawn theih(movable feast) an tih zînga mi a ni. March 20 leh April 23 inkara ni engemaw berah a thleng ðhin. Kum zabi khatna lai aţang tawh khan kohhran hote'n Zirtawp nî hi chawnghei ţawngţai neih nî atân an lo serh hrang daih tawh a, Good Friday anga hman erawh a ni lêm lo. Kum zabi li-na aţang chuan Easter Sunday hmaa zirtawp nî hnunung ber chu Lal Isua Kross-a khenbeh a nih hriatrengna nî-ah an serh hrang ta a. Chuta ţang chuan tuna kan hman chhoh tak zêl Good Friday hi a lo inţan ta a ni. A tir lamah chuan a hmingah pawh Zirtawp Thianghlim(Holy Friday),Zirtawp ropui(Great Friday), ti tein an sawi ðhin a. Mahse, kum zabi 6-na vêl aţangin Roman Kohhran-in Good Friday an ti a, chu hming chu a lo pu hlen ta a ni.

Good Friday hi Pathian fak leh chawimawina hun atân te, a remchâng chuan Lalpa Zanriah Sacrament kilho nân te kan hmanġ ðhin a. Kan ramah hian Kohhran hmasa lamte chuan Lal Isua tuarna rapthlak leh mualphothlak tak chu tuarpuina leh sunna rilru puin, hmun ðhenkhat chuan pulpit leh a chhehvela puan dum zarte pawh an lo chîng hial ðhin a ni awm e. A tuarna lam an sawi uar a, hlahte pawh an sa tam hle ðhin a. Kan Mizo hla phuah thiamte pawhin chutiang lam hawi zawnga rilru hruai thei turin hla ðha leh lungkuai tak

tak an lo puah bawk a. Tun thlenga kan sak tamte an la ni ta zêl a ni.

Kan Zosap Missionary-te kaihhruaina hnuaiiah Mizoram kristiante pawhin ni pawimawh ber pakhatah neihin kan serh a, kan ngaihluin kan la urhsun êm êm a ni. Lâk urhsun âwm tak pawh a ni rêng a. Pathianin soal bawiha tangte a chhanchhuahna tura a thil tum lian ber, Thuthlung Hlui lama zawlneite hmanga a lo puan lawk tihfamkimna a ni (cf. Isaia 53).

Hun lo kal zelah kan rilru put hmangte inthlak danglam ve zêlin, chulam hawi zawng ngawr ngawra Good Friday hmang kher lovin, Pathian Fapa tuarna chuan mihringte tân chhandamna leh lawmna ropui tak min thlensak zawk ziate fiah leh Chiang zawka hriatthiamna nen, fakna leh Amah chawimawina hun atâna hman dânte kan lo thiam ta zêl a. Tun thlengin Good Friday hi kohhran ten thlarau lam malsawmna a thara kan dawnna hun a la ni reng thin.



**EASTER PATHIANNÎ**  
**(April 9, Pathiann\$)**

Easter Sunday hi Lal Isua thihna hneha ropui taka a thawhleha hriat-renga nî atâna khawvêl pûm puia kristiante ni serh pawimawh a ni. Tirhkoh Paula chuan Krista thawhleha chu kan rinna inngahna bul leh a Chanchin Tha hril inngahna a ni, a ti hial a ni (1Kor. 15:14;17). Christmas hi mihringte tana lâwmna ni ropui tak a nih laiin, Lal Isua tan chuan mihringte chhandamna hna harsa leh khirkhkan tak thawhsak tura tuarna bul a rawn tanna ni a ni ve thung a. Good Friday phei hi chu a hna thawh tleitlakna tura tuarna vawr tawp a hmachhawmna nî a ni a. Easter Sunday hi chu a ropui chung chuang êm êm a, hnehna leh lâwmna ni ropui ber a ni. Khawvêl hmun tina ringtute chuan Lal Isua chawimawina hun atân leh a thawhleha thiltihtheihna hmachhuan-a khawvêl hnehna puan khumna hun atân an hmang thin. Kohhran hmasate hun lai atang leh tun hun thleng pawhin kohhran tam takin Baptisma channa hun atân an hmang thin a. Baptisma chang tharte chu thawhleha nun thar entirna atân puanvâr an sintîr bawk thin a ni.

Hun eng emaw ti hnu-ah Easter Sunday hman chungchanga a hun thua ringtute zingah inhnialeha leh duh dân inang lo, a lo awm tak avângin Nicea Inkhawmpui(Council) chuan ngaihtuahin, tuna kan hman lai mêk Sunday-a hman turin a lo rêt fel ta a. He rorêlnaah hian Rom lal Constantine-a pawh a tel ve a, thu sawitu pawimawh tak pakhat a ni. Nicea inkhawmpui atang chuan kristiante chuan Easter hi Sunday ah an lo hmang

chho ta zel a ni. A lo thlen hun tahrik ni erawh chu pangngai reng lo chi (movable feast) baw kha a nih avângin March 22 leh April 25 inkara eng ni berah emaw a thleng ðhin.

Engpawhnise, a hun bi dik tak hi hre lo mah ila, kan hmanna chhan tak Lal Isua hun tawnga thil thlengte kha kan chhandamna kawng min siamsakna a nih avangin, chumi hriatrengna atâna kohhran hote'n lungruala kan lo hman chu Pathianin min pawmpui a ni tih a Chiang a. Ringtute thinlungah he nî hian Pathian pâwlna nung siam sakin rah duhawm tak a chhuah sak fo ðhin a ni.

**KRISTIAN NAUPANG PÂWL NÎ  
(KNP Day)  
(April 23, Pathiann\$)**

**Thupui : Naupangte chhandamna hriltu an ni thei  
(II Lal. 5:3; Mt 14:17)**

Kristian Naupang Pâwl (KNP) hi BCM anga Naupangte zinga rawng kan bâwlna leh tualchhung kohhran tina kan ngaih pawimawh êm êm pâwl tangkai leh hlu tak a ni a. Naupangte hian zirtîrna tha an mamawh tak zet a; naupang an nih lai aţanga enkawlna leh zirtîrna tha an dawn chuan an puitlin thlengin an zawm ang a, hlawhtlinna duhawm tak an nei dâwn a ni (cf. Thuf.22:6). An talent haichhuah saka hmang tangkai thiam tura tanpui leh kawng zawn sak hi a ʔul êm êm a. Kan ramah hian a kohhran ang pawhin BCM hi helama hma la hmasa leh ke pên hmasa kan ni a. Tunah chuan kohhran pawl dangte pawhin a ʔulzia leh pawimawhna hriain, an huang chhungah naupang pual programme tha leh hlung tak tak an buatsaih chho ve ta zêl a, a lawmawm hlê mai.

BCM Assembly in Kristian Naupang Pawl(KNP) lo inţanna leh KNP Day atân pawha min puan sak chu April 23, 1943 kum kha a ni a. Serkawn Kohhran Upa Committee in an veng chhunga naupang inthlahdah turte kilkawia an puala inkhawmte pawh lo huaihawtpui turin Zosap Pi Zoduhi (Mrs.EM Oliver) leh Pi Rovi te an ruat a. Anni chuan hma lain hemi nî

(Easter Sunday ni) hian naupang hote chu inkhawmna an neihpui ñan ta a. Chuta ñang chuan naupang puala inkhawm chu mumal takin an lo nei thei ta a ni. Kum 1967 Assembly-in 'khaw tinah naupang inkhawm neih ni se, General Committee-in a kaihhraina siam rawh se' a tih angin kum 1968-1983 chhung chu BKHP-te enkawl turin dah a ni a. Kum tin thu zir te buatsaihsakin, KNP Hruaitute tan Leadership Training-te a siam sak ñhin a. KNP pualin Evangelist Teacher-te ruaiin an hlawh tur atan target an intuk ve ñhin a ni.

Assembly ruahmanna angin kum 1984-2001 chu Sunday School leh Christian Education Department enkawlina hnuaiah awm lehin, kum 2001 aṭangin Fellowship Department hnuaia Fellowship pakhat anga enkawlin, KNP bik enkawltu tur KNP Promoter ruat a ni ta a ni.

KNP pual Chanchin Bu ‘Naupangte Thian’ chu kum 1997 aṭang khan tih chhuah a ni a; tun thlengin hma a sawn zel a, a lawmawm hle. KNP hian thuvawn ṭha tak an nei a, *‘Lalpa thu sawi rawh, i chhawhhlawhin a ngaihlathla e’* (1Sam.3:9) tih a ni. Naupangte ngaihlak turin Lalpa’n keimahni kaltlangin thu sawi fo rawh se.

## BUHFAIṬHAM PATHIANNÎ (April 30, Pathiann\$)

Mizoram Baptist Kohhran mite hian Buhfaitham bul kan ṭanna hi a rei ve tawh hlê mai. Presbytery (tuna Assembly) minutes-ah chuan Kum 1919-ah Buhfaitham chungchang hi a lang chauh a. Amaherawhchu Kohhran minutes-a fel taka a lan hma hian Buhfaitham hi an lo ṭan daih tawh tih hriatna chu, Sap Upa in Baptist Missionary Society(BMS) hnena annual report a peknaa kohhran hmasawna a sawi zîngah mi ṭhenkhatin buhfai an ṭham thu hetiang hian a ziaak a. *“Chaw an chhum dawnin an buhfai thlak tur aṭangin vei khat vêl tur hi an ṭham chhuak ṭhin a. Chu chu an hotute (Superintendent) hnenah pein a tlingkhawm chu an hralh a; chu chu Lalpa rawngbawl nân an pe ṭhin a ni. An tan hmeithai dar tangka dere ang kha a ni a, malsawna a thlen ngei an beisei a ni,”* tiin.

Hei hi kum 1916-a a ziaak a ni a. Chutiang chu a nih chuan bul an ṭan hun tak hriat nilo mahse, kum 1915 emaw 1916 velah chuan buhfai an lo ṭham tawh tihna a ni thei ang. Tichuan, Buhfaitham rawngbâwlnain hma a sawn zêl theih nâna tichak turin kohhran chuan kum 1962-ah Sub-Committee dinin hmeichhe pathum, Pi Zohnûni, Pi Lalêngi leh Pi Chhunmawii te a ruat a. Kum 1965 kuma Baptist Kohhran Hmeichhe Pawl(BKHP) a lo din hnu lawk khan Assembly chuan Buhfaitham enkawlna

hna chu an kutah a dah ta a. Pastor Bial huap leh tualchhung kohhran tân pawh Campaign-te neiin an feh chhuak thin a, hma pawh a sâwn chak hlê a ni.

Buhfaitham hi a tir lamah chuan kohhran sum puiah chhun luh thin a ni a. Hmeichhe tirhkoh awm lain an hlawah hman a ni leh a, an awm loh chinah kohhran sumpuiah a lut leh a ni. Kum 1947-ah thingtlang lama Nursery School zirtirtute hlauh atân hman a ni leh a, kum 1968-a Nursery School a lo tawp khân Zoram Baptist Mission(ZBM) pualah hman a lo ni ta a. Tunah chuan Kohhran sum puiah chhun luh a ni leh tawhin tun thlengin Buhfaitham hi ramthim rawngbawlina atan tangkai taka hman a ni zui ta zêl a ni. Buhfaitham kaltlanga Pathian ram tih zauh zelnaah hian chhûngkaw tin ten chanvo ropui tak kan nei a ni tih hriain tan i la zêl ang u.

**BAPTIST KOHHRAN HMEICHHE PÂWL NÎ  
(BKHP DAY)  
(May 2, Thawhlehn\$)**

A din tih ațangin Baptist Kohhran Hmeichhe Pâwl hian BCM hmalakna chi hrang hrangah tha a thawh nasa hlê a. He pawl hi Kohhran chhunga Pâwl (Fellowship Department) din hmasak ber a niin, thlarau lam rawngbâwlnaah pawh kohhran hnuk leh chelh mar tlattu pâwl țangkai tak a ni. Kum 1938 March thlaah BMS Missionary Pi Zirtiri (EM Chapman) hovin Girls Auxiliary (GA) chu Assembly hriatpuina leh kaihhruainaa din a ni a. Hruaitu hmasate chu hêngte hi an ni.

NI Thenvungi, President

NI Laltinhang, Secretary

NI Nûchhûngi, Treasurer

Girls Auxiliary (GA) hian nula chauh a huam a, chhungkaw țanpui ngaite țanpui chu an tum ber pakhat a ni. Kum 1947-ah Nû Pâwl din a lo ni leh ta a. Chutianga hmeichhe zînga pâwl pahnih lo ding ta chu Assembly hotute chuan fel tawk lova hriain, pâwl pahnihte chu pâwl khatah dahin March 20, 1965-ah chuan BKHP din a lo ni ta a. He pâwl hian Baptist Kohhrana hmeichhia zawng zawng, kum 14 chung lam, a duh apiang chu a huap vek a ni.



Kum 23 chhûng zet chu March ni 20 hi BKHP Day atan hman thin a ni a. Hei hi MBKHP Executive Committee-in ngun taka a ngaihtuah that hnuah, *“Mizoram Baptist Kohhran hmeichhe rawngbawlna awmze neia a din chhuahna chu May 2, 1938 hi a ni e,”* tiin BKHP Day atâna hman zâwk turin Assembly General Committee-ah a thlen a. A thlen ang hian rem tihsak niin kum 1990 aţang chuan ram pûmah BKHP Day chu May ni 2 ah hman a lo ni ta a ni.

MBKHP hian thutiam, din chhan, thil tum leh inkaihhraina fel tak a nei a. BCM Assembly rorêlna hnuai a awm a nih angin BCM Constitution & Rules leh Assembly rorêlte kalh lovin thil a ti thin.

**BAPTIST MIPA PÂWL NÎ**  
**(BMP DAY)**  
**(May 04, Ningans)**

Baptist Mipa Pâwl (BMP) hi May 4, 1980 khan Thingsai khuaah din òan a ni a. A hmingah sap tawngin *'Baptist Men's Fellowship'* tih a pu hmasa phawt a; kum 1983-ah *'Baptist Mipa Pâwl'* tia thlak a ni leh ta a. Kum 1988 Assembly-ah Baptist Mipa Pâwl din thu hi ngaihtuah a ni a. BMP chu kohhran hnuaia pawl (fellowship) pakhat ni tura pawm niin, tualchhông kohhrana din phalsak an lo ni ta bawk a; Bial anga din chungchang erawh chu sawi rikna a la awm lo a ni.

Tichuan, kum 2011 Assembly chuan BCM Planning 2010 chu pawmpuiin tualchhung kohhran bâkah Pastor Bial huapa inthlunkhawmna neih a lo phalsak leh ta a. Chak taka hmasawn zêlin Unit leh Bial huap BMP chuan pun lam a pan ta zêl a. Bial BMP inkhawmpui leh rorêlte neiin, kohhran pawh nasa takin a tiphuisui a ni. Tunah chuan pâwl òangkai leh kohhran kutke pawimawh tak a lo ni ta reng mai. Chu mai ni lovin Planning Commission ruahmanna chu 2021 BCM Assembly chuan pawmpuiin, kum 2021 aòangin Mizoram Baptist Mipa Pâwl (MBMP) chu Hqrs Office-ah Full time Secretary neiin kalpui òan a lo ni ve leh ta a ni. Tin, ram pûm huap Inkhawmpui leh rorêl pawh kum thum dan zela neih

remtihsak a ni a. Hemi hma hian kum 2014 (Bazar veng Biak In, Lunglei), 2017 (BCM Zobawk, Field) leh 2020-ah Thingsai Field-ah te MBMP Meet hlung taka neih a lo ni tawh bawk.

BMP Day atân chuan May 4, Thingsai khuaa din a nihna kha BCM Assembly 2005 chuan pawmsakin kumin hi BMP Day vawi 43 kan hmanna a lo ni ve leh ta reng mai. Hmun tina BMP ten hlung leh hlawk taka kan hman theih theuhna turin programme buatsaih ila. Kohhran hruaitute leh Fellowship dangte pawh sawmin chanvo kan siamsak theih chuan a lawmawm hlê ang.

**KRISTIAN CHHÛNGKAW NÎ  
(May 14, Pathiann\$)**

**Thupui : I inah hawng rawh (Lk. 8:39)**

Mizoram Baptist Kohhranin kum tina Kristian chhungkaw nî kan hman ðhin hi kohhran mite'n kan hlutin kan tuipei hle ðhin a. Kan hmang rei tial tial a, kan hmang hlung tulh tulh ni pawhin a lang. Kum 1948 khan North East India Christian Council (NEICC), khatih hun laia Assam Christian Council (ACC) inkhawmpuia kal Baptist kohhran palaite chuan, BCM Assembly-ah report ngaihnawm takin an pe a. Kristian chhungkaw pawimawhzia uar takin an sawi bawk a. Assembly chuan ngaih pawimawhah neiin a umzui nghal a. May thlaa Pathianni remchâng ber chu kristian chhungkaw nîah hman nise, tiin a rel ta a. A hman dan tur ngaihtuahtu Sub-committee pawh siam nghalin Memberte chu Pi Reii (Mrs Florence Raper), Rev. HS Luaia leh Upa Liandâla te an ni.

Hun rei tak chhûng Kristian chhungkaw nî atâna Pathian nî vawi khat kan hman ðhin chu kohhran mite thinlungah duh khawp lohna a lo lian zel a. Kum 2003 Assembly-ah Kristian chhûngkaw chawlhkar hman rawtna lo lut chu tihtluk a ni a. Kum 2004-ah kristian chhûngkaw nî behchhana chhûngkaw chawlhkar hman rawtna a lo lut leh a. Chutiingin 2005 Assembly-ah a lo lut leh bawk a. Chutia a

zâwna kum thum zet ngaihtuah a nih takah chuan Assembly chuan Kristian chhûngkaw chawlhkar hi kum tina hman ni tawh sela, zir tur pawh a buin Headquarters lamin buatsaih ðhin ni tawh se, May thlaa Pathianni vawi thumna hi Kristian Chhûngkaw Nî-ah hman ni se, chumi chawlhkar tluan chu Kristian chhungkaw chawlhkar ah hman ni rawh se, a ti ta a. Kristian Chhungkaw Ni (Pathian nî) behchhana hman turin programme leh zirlaite pawh a buatsaih ta ðhin a ni.

BCM-in Kristian Chhûngkaw Nî, ni khat hman mai duh tawh lova Kristian chhûngkaw chawlhkar kan hmang ta zêl hi a hlâwkthlakin kan la tih chhoh zêl hmel a. He hunah hian Kristian chhûngkaw hlutzia leh pawimawhzia te, Pathian thu anga chhûngkaw in kilkawi ðhat a ðulzia te, ram leh khawtlâng tâna mi ðha leh mi dik chher chhuahna hmun ðha ber chu Kristian chhûngkaw dik tak din hi a ni tih kan inzirtir uar zêl pawh a ðul hle. Kohhran leh chhûngkaw tinte Pathian chakna rinchanin i ðang zêl teh ang u.

**THLARAU THIANGHLIM THLEN NÎ**  
**(May 28, Pathiann\$)**

**Thupui : Thlarau Thianghlim in chang em?**  
**(Tirh 19:2)**

Thlarau Thianghlim thlen ni hi Good Friday hun anga kum tina insawn danglam fo thin a ni a. Kuminah hian May 28-ah a lo inher chhuak ve leh ta a. Mizoram kohhrante pawhin khawvêl pûma kristiante Calendar-a ni pawimawh, kum tina an hman thin chu zawm vein, BCM pawhin ni pawimawh zîngah chuantîr ve zêl thin a ni. Headquarters lam aţanga hman dân tur programme duan a ni lem lo va; tualchhung kohhranin ţha leh rem a tih anga hman mai tur a ni. BCM hian eng hun chiah aţang khan nge he nî hi kan lo hman ţan tih record a awm lova. Kan Missionary-te kaihhruainain kohhran din tirh tê aţanga hman chhoh ve zêl ni-âwm tak a ni.

Tun hma chuan ‘Pentikos Nî’ tia lam ve mai thin a ni a; hei hi BCM Assembly chuan Juda-te kût chhawm zui zêl kan nih loh avângin dik tawk lovin a hria a, ‘Thlarau Thianghlim Thlen Nî’ tia hman turin a lo rêl ta a ni. Thlarau Thianghlim hi Lal Isua thawhlejni aţanga chhuta ni sawmnga-naah a lo thleng a. Ringtute hnêna leih a nih nî chiah a nih bawk avâng leh, kohhran din a, tiharh a, thiltihtheihnaa thuam leh a chênchilh ţan nî a nih avângin, he nî hi ringtute leh hmun tina kohhrante tân ni pawimawh leh chhinchhiah tlak a ni.

*‘Tin, Thlamuantu, Thlarau Thianghlim, Pain ka hminga a rawn tirh tur khan, chumi chuan engkim a ziriSr ang che u a, in hnêna ka sawi zawng zawng a hriat chhuahtSr leh ang che u’ (Joh.14:26).*

*Tin, an awmkhawm a pâwl ve a, “Jerusalem khua kalsan suh u, Pa thiltiam ka sawi in hriat kha lo nghak rawh u” a ti tlat a (Tirh.1:4).*

*‘Nimahsela Thlarau Thianghlim chu in chung a lo thlen hunah thiltihtheihna in la nei ang; tichuan, Jerusalem khuaah te, Judai leh Samari ram khawtinah te, kawlkil thleng pawhin ka thuhretute in ni ang’ (Tirh.1:8).*

## ṬHALAI KRISTIAN PÂWL RAMTHIM NÎ (May 29, Thawhtann\$)

### Thupui : Krista thuhretu rinawm (Tirh. 1:8)

A din tirh aṭangin ṬKP hian ramthim veina lian tak a nei sa a. Inkhawmpui hmasa ber Pukpui (1955) a neihah chuan ‘ṬKP hminga thuhrihtu tirh’ tih agenda ngaihtuah leh rêl nghal a ni a, tichuan, kum 1956 Inkhawmpui Hnahchang khuaa neihah pawh ‘Tuikuk Takam pual ni bik neih’ tih a rêl leh a. Tichuan, kum 1959 inkhawmpui chuan October 5 hi ‘District ṬKP Tuikuk Takam Ni’ atân hman ni se, tiin a rel ta a. Mahse, kum 1960 a rorêlna chuan September thlaa Thawhtan ni hnuhnung ber chu hman turin a rêl leh a. Hun rei tak chhûng chu he ni hi Ramthim pual ni atân hman zui a ni. Mahse, ‘Tuikuk Takam Nî’ tih chu huap zim deuha hriat a nih avângin 1969-ah chuan ‘ṬKP Ramthim Nî’ tia thlak leh a ni a.

Mahse, September thla hi Beirual thla a lo ni a, kan duh thawh fo ṭhin avâng leh programme dang dangte kohhranin a huaihawt duh ṭhin avângin remchang tawk lova hriat a lo ni leh ta a. Kum 2006 MṬKP Inkhawmpui (S.Vanlaiphai) rorêlna chuan, May thlaah ni tawh se, a hun atân chuan BCM-in ram pawna Missionary a tirh chhuah hmasak ber Rev.H. Rokhama te nupa tirh chhuah ni, May 29 (1968) hi hman ni se, tia a rêl angin ṬKP Ramthim Nî chu hemi nî-ah hian kum tina hman zui zêl a lo ni ta a ni. BCM hnuaiia Fellowship lian leh thawh hlawk em em, ṬKP-te thinlungah Pathian ram a lo zau



zelnatira ramthim veina hi lian telh telh se a va duhawm em!

**RELIEF PATHIANNÎ**  
**(June 18, Pathiann\$)**

**Thupui :** Nangmahni'n eitûr pe rawh u.'  
**(Lk.9:13)**

Mizoram hian hun harsa leh khirh tak tak a tawk fo va. Mautam t̄am, rambuai leh sawikhawmte bakah, khuarel chhiatna (natural calamity) chi hrang hrang, kangmei, tuilian, leimin, thlipui, lirnging leh a dange tawkin, mipuiin t̄am leh manganna rapthlak tak tak kan lo paltlang tawh t̄hin a ni. Kum 1960 ațanga Constitution hmanga kohhran kan inrelbawl t̄an khan, kohhran tihpuitlin turte z̄inga pakhatah 'rethei t̄anpui leh chhawmdâwl' tih hi dah a ni a; Kohhran chuan a theih ang angin helam hawi hian ke a lo pen ve reng tawh t̄hin a ni.

Kan Bible (Thuthlung Hlui leh Thuthlung Thar) lamah pawh hmun tam takah t̄anpui ngaite t̄anpui leh chhawmdâwl hna hi kan tih ngei ngei tur a nihzia chiang taka tarlan leh zirt̄rna kan hmu a. Thuthlung Thar Kohhran lo din tirh phat ațang khân hei hi a ngaih pawimawh hmasak pakhat a ni. Mizoram Baptist Kohhran pawhin hetiang ang thila ram p̄awn leh ram chhûng ațanga t̄anpuina (relief) kan dawn hrang hrangte rualkhai leh mumal taka mamawhtute hnena pek chhuah d̄ante a ngaihtuah ve reng a. Tin, he rawngb̄awl hna hi kohhrante thinlungah tuh thar z̄el a, kan lo uar deuh deuh theihna turin a bika thawhlawm (relief fund) siamte pawh a

ngaipawimawh a; kan inzirtîrna hun atan June thla Pathian nî vawi thumna hi hemi puala hman turin Kohhran ni pawimawh pakhatat, Relief Pathian ni' tiin a lo dah ta hial a ni.

Hei mai hi duh tawk lovin BCM chuan he tanpuina leh chhawmdawl rawngbâwl hna hi zau zawk leh tangkai zawka hma la zel turin kum 1990 atang khan Relief & Development Department dinin, he Department kaltlang hian nasa takin hma a la ta a. BCM aiawhin a tulna hmun apiangah tanpuina leh chhawmdâwl hna chu vawiin thlengin a la thawk ta zel a ni. Hêngte bâkah hian training chi hrang hrang a buatsaih bawk thin a.

## MISSION PATHIANNÎ (July 02, Pathiannî)

**Thupui : Chanchin tha, mi tin tân (Marka 16:15)**

Wawiin hi, ‘Mission Pathianni’, tih hming pu a BCM-in ni pawimawh kan hman wawi rukna a ni. Tun hma chuan Missionary Sunday tih a ni ðhin a. Kum 1970 Assembly chuan July thla-a Pathian ni hmasa ber hi Missionary Sunday tih ni se, hemi nê hian mission lam hawi thuchah te, kan mission lam chanchin leh Missionary-te rawngbawl-na-te kohhran mipui hnenah sawi ðhin ni se, tiin a rêl a. Hetianga hun rei tak kan kalpui hnuah kum 2016 BCM Assembly ah BCM ni pawimawh-te thlir ðhatna neiin, hming thlak danglam ngai leh hman remchâng tawh lo nia lang ðhenkhatte paih ðhen chungchang sawihona neih a ni a. Administrative Committee-in bawhzuiin ruahmanna a rawn siam chu pawmpui-in, Missionary Sunday kan hman ðhin chu a nê tidanglam lo leh, kan hman dân kalphung tidanglam chuang lovin ‘Mission Pathianni’ tia thlak a lo ni ta a ni.

Kan Lal Isuan, ‘*Kal ula, hnamtina mi zirtirahte siam ula*’ a tih hi ram hrang hranga Baptist ho hian an ngai pawimawh hlê a, ‘*Baptist kohhran chinchhiahna chu Mission hi a ni e*’ an ti hial ðhin. BCM pawhin thupui (Motto) atân, ‘*Chanchin Tha mi tin tân*’ tih kan hmang a. Hei hian Mission kohhran kan nihzia a tilang chiang

hlê a ni. BCM hian a pian tirh phat atangin Mission rawngbawlna hi a buaipui nghal a. Inkhawmpui neih hmasak ber (1904) rorêlna chuan, ringtu tinin ring lo mi pakhat tal ringtua siam turin a rêl a, Kohhran mite'n an phak tawk ang zêlin hma pawh an la nghal a ni. Kum 1939-ah khan thla khata Rs 12/- hlawhin Tirhkoh pahnih Kawha leh Siama te an ruai a, anni hi kohhranin hlawh neia tirhkoh a rawih hmasak berte an ni. Hre lote hnêna Chanchin Ṭha hril ngaih pawimawhna thinlung hi Kohhran mite-ah lo ṭhang lian zel rawh se.

**ṬHALAI KRISTIAN PÂWL NÎ  
(ṬKP DAY)  
(July 30, Pathiann\$)**

**Thupui : ‘Pathian nen lo inrem rawh u’  
II Kor. 5:20)**

Kohhran kutke ṭangkai leh member nei tamna ber Thalai Kristian Pawl hi Presbytery (Assembly ni ta)-in a lo phalsak tawh angin, kum 1952 Inkhawmpui Pukpui-a rorêlnain ṬKP din a rawtna chu pawmpuiin Pastor Biala din phalna pawh a pe nghâl a. Tichuan, Kohhran dinna hmun hrang hrangah Unit leh Bial ṬKP chu a lo ding nghâl ta chur chur mai a ni.

Hetih lai hian Mizoram chu Assam State chhûnga District pakhat mai a la nih avângin ram pûm huapa inkhaikhawmna pawh District ṬKP tih a la ni a. TKP Inkhawmpui hmasaber chu October 22-23, 1955, khan Pukpui-ah neih a ni a. ṬKP Day hman hun chungchangah hian Inkhawmpui ni hmasa zawk October 22 hi hman ni se, tia committee-in a rel angin hun rei tak chhung chu hemi ni hi hman a ni ta a. Amaherawhchu, hun lo kal zelah ṬKP Day hman hun hi dik hlel deuha hriatna a lo awm tak avângin vawi eng emaw zat rêl leh sawihona neih a nih hnu-ah MṬKP rorêlna (1995) chuan, Serkawna mi ṭhahnemngaite leh kohhran hruaitute’n Missionary-te kaihhruaina hnuaiia Ṭhalai Kristian Pawl an lo din ni

leh kum (July 30, 1951) chu Mizorama ṬKP kum chhiar ṭanna hun atana hman turin a lo rêl fel ta a. Chu chu BCM General Committee-in pawmpuiin, kum 1997 aṭangin July 30 ah ṬKP Day hi hman a lo ni leh ta a ni.

Kohhrana Thalai pâwl lo ding ta hian rah tha a chhuah nasa hle a. Mission lam rawngbawlnaah te, khawtlâng ṭhatna tura hmalakna kawngah te, zau zawka ṭhalai pâwl dangte nena thawhhona lamah te, Pathian ram leh kohhran tana mi puitling chherchhuah zêlna kawngah te, kawng tinrengah kohhran kutke leh chakna pawimawh ber pakhat a ni chho ta zêl a ni.

## NEICC ṬAWNGṬAI NÎ (October 15, Pathiann\$)

North East India Christian Council (NEICC) hi India hmarchhak state hrang hranga kohhran leh kohhran pâwn lama rawngbawl (Para Church)-te thawhhona pâwl pakhat a ni. Kohhran hrang hrang (denomination) 35 leh Para church 17-te chu tuna he pâwl member-te an ni.

Kum 1937, November 23 ah Assam Christian Council din a ni a; a dintu zingah BCM pawh kan tel ve nghe nghe a ni. Amaherawhchu, hun lo kal zelah hmarchhakah state hrang hrang a lo piang a, state pakhat hmingin a huam zawh tak loh avângin kum 1962 khân NEICC tiin a hming thlâk a lo ni ta.

He pâwl thil tum ber chu kohhran inpumkhatna leh inunauna ṭha siam a, a ṭul huna ram rorêlna leh sawrkar hmaah pawh hmarchhak kristiante aiawha din a ni. Inrêlbawlna fel tak neiin kum khat danah inkhawmpui rorêlna neih ṭhin a ni a. Kohhran member neih tam dân azirin palai tirh theih zat siam ṭhin a ni. Hruaitu (OB) inthlangin Secretary chuan full time-in a thawk a. Hruaitu dang chu kum hnih term zêl a nih laiin Secretary chu kum li term a ni thung. NEICC hnuaiah hian Ṭhalai Pâwl (Youth Assembly) leh Hmeichhe Pâwl (Women Assembly)-te awmin, anni hian a hranin Inkhawmpui pawh an nei ṭhin.



Vawiina kan hman mek NEICC Tawngtai Ni hi kum 1975 Inkhawmpui, Shillong khawpuia, Church of North India-in a dâwl kuma pass a ni a. A tirah chuan November thlaa Pathian nî vawi thumna-ah hman ðhin a ni a. Kum 1994 Inkhawmpui, Aizawl Chanmari Presbyterian kohhranin a thlen ðumin, kum tin October thlaa Pathian nî vawi thumnaa hman turin a lo rêl leh ta a ni. Hemi nia thawhlawm pawh NEICC inrêlbawlina atân pêk ðhin a ni bawk.

## KHAUVÊL SUNDAY SCHOOL NÎ (November 05, Pathiann\$)

**Thupui : Pathian thu nung, thiltithei.  
(Heb. 4:12)**

Khawvêl Sunday School Nî dintu chu khawvel puma Sunday School rawngbawl naa mi pawimawh tak America (USA) mi, Dr. George Bailey a ni a. Kum 1907 khan ama huaihawtin khawvel pûm huap Sunday School Nî chu Rome khawpuiah an lo hmang tawh a ni. Kum 1910 khan World Sunday School Association President atan thlan a ni a. India ramah chuan November thlaa Pathiannî hmasa ber hi khawvel Sunday School Nî atân kan hmang a. Mizoram Baptist Kohhran hian kum 1939 khan All India Sunday School Union a zawm ve a, chuta tang chuan khawvêl Sunday School nî pawh India ram hmun danga mite rualin kan lo hmang ve ta zêl a ni.

Khawvêl Sunday School Nî-ah hian Sunday School lo pian chhuah dan tawi têin zep ila, a tha ang e. England rama Gloucester khuua Anglican kohhran member pakhat Robert Raikes chuan Pathiannîa naupang tam tak, tih tur hre lova vak rawlai mai mai, lehkha zirna pawh nei lote chu a vei hlê a. Lehkha zirtîra, Pathian thu an zir nghal theihna tur ngaihtuhsak tulín a hria a. Mahse, amah ringawt chuan thil harsa tak ni dâwna a hriat avangin

a thianpa Thomas Stock chu Sunday School dinpui turin a sawm ta a.

Tichuan, kum 1780, July thlaah chuan Gloucester khuaah Sunday School chu a lo ding ãan ta a ni. A tirah chuan hlawh neiin zirtîrtu tur mi an ruai a. Pathianin mal a sawm a, reilote chhûngin naupang za rual zet zirlai an nei ta mai a. Mite'n a ãhatzia hmuin hmun hrang hrangah an din chho ta zêl a, a din aãanga kum nga lek chhungin England ram pûmah Sunday School 4000 lai a ding nghal ta dêr mai a ni. India ramah hian Baptist Missionary William Carey-te ãhian za hovin kum 1800-ah khan bul an ãan a. Chuta ãang chuan hmun hrang hrangah a lo darh zau ta zêl a. Mizoramah pawh hmun tinah Sunday School dinin kohhran dotu ban nghet leh ãangkai tak niin, tisa leh thlarauva mi puitling chher chhuahna hmun pawimawh ber pakhat a lo ni ta hial a ni.

**BWA HMEICHHE ṬAWNGṬAI NĪ**  
**(November 06, Thawṭann\$)**

Kum tinin November thlaa Thawṭanni hmasa ber hi khawvêl pûm puia Baptist Kohhran Hmeichhe Pâwl-te chuan ṭawngṭai ni atân an hmang ṭhin a; hmun tina hmeichhe pâwlte ngaihhlut a hlawhin nuam an ti hlê ṭhin a ni. A chhan chu hmel inhmuin intlawhpawh phâk kher lo mah sela, thukhat vua leh thupui thuhmun hmanga Pathian hmaa kun za-te chuan thlarauvah thinlunga inzawmna thûk tak an nei a. He hun hi an ngaih pawimawh êm avângin hmun pilril leh thlalêr deuha chêngte pheî chuan an hmun ruat thleng turin kawng hla leh chhengchhe tak tak an zawhte pawh a ngai fo ṭhin a ni.

Hê ni lo chhuah ṭanna chu kum 1948 khan Women's Committee of the Baptist World Alliance Chair-person Mrs. Olive Martin-i huaihawtnain London khawpuiah, ram hrang hrang 9 aṭanga kalkhawm Baptist hmeichhia 19-ten ṭawngṭaihona an hmang a. Khawvêl indopui 2-na zawh hlim, mi tam takin harsatna nasa tak an tawh laite a ni bawk a; chutia rilru inhmu tlâng taka Pathian hmaa an han kunho chu nuam an tiin thlamuanna nasa tak an lo nei ta a. A hnu ni thum lekah European Baptist Women's Union a lo ding ta a. Chu pâwl

hmalakna chuan Baptist hmei-chhiate ṭawngṭai ni siamin, November chawlh-kar hmasa bera hun remchangah an kal khawm ta ṭhin a ni.

Tichuan, kum 1950-ah Baptist Women's Day of Prayer chu din a lo ni ve leh ta a. Chu chuan khawvêl huapin ni thuhmunah, thupui thuhmun hmanga ṭawngṭaina nî a rawn herchhuahpui ta a. He nî hi ṭawngṭai nan ngawr ngawra hmang lovin, thupui leh programme pawh khawmualpui hrang hranga mite'n insiam chhawkin, Testimony ropui leh ngaihnaawm tak tak te, sermon leh Bible study hlawk thlak tak takte zir leh ngaihthlak hona hunah an hmang ta ṭhin a ni. Vawiinah hian MBKHP member zawng zawngte pawh kan unau khawvêl hmun danga mite hun hman lo ṭawmpui ve turin ṭhahnemngai takin kan insawm a ni.

**NAUPANGTE NÎ**  
**(November 19, Pathiann\$)**

**Thupui : Tho la, naupang kha kaitho la, i kutin  
 chelh rawh (Gen. 21:18)**

Inkaihhruaina fel tak neiin BCM chuan Kristian Naupang Pâwl (KNP) a enkawl a. Naupangte Thlarau lama an puitlin chhoh zêlna tur bâkah nunphung (manner) an hriat theihna turin programme chi hrang hrang, inkhawm leh thuzirte a siamsak thin a ni. Vawiina BCM Ni Pawimawh pakhat ‘Naupangte Nî’ hi KNP puala kan hun hmante nen ngaih pawlh tur a ni lo vang. Bible-in naupangte dinhmun, ngaihsak leh tha taka enkawl an tulna leh pawimawhna min hrilh fo a. Mi thiamte leh khawvêla mi fîng tak takte pawhin naupang enkawl that hi an ngai pawimawhin, nakin lawka kan ram leh hnam kaihruitu turte an nih avânga zirtîrna tha pêk a tulzia hi an hrechiang êm êm a ni.

India ramah hian kan Sawrkar chuan November 14 hi Naupangte Nî (Children’s Day) ah a puang a. He nî hi India ram Prime Minister hmasa ber Pandit Jawaharlal Nehru, naupangte ngaihsak êm êmtu pian nî a ni. Khawvêl huap pawhin naupangte pual ni pawimawh tak tak, International Children’s Day, World Childen’s Day leh Universal Children’s Day tihte a awm a. Heng nîahte hian naupangte pawimawhna, zirtîr leh

enkawl an ṭulna te, an tih ve tur leh an mawhphurhnate nasa takin an tarlang chuai chuai ṭhin.

Mizoram Baptist Kohhran pawhin kohhran pûm huapa naupangte ngaih-pawimawhna lantirin, kohhran mipuite inzirtîrna hun atân ‘Naupangte Nî’ hman ve ṭha a ti a. Kum 2016 aṭang khan November Pathian ni vawi thumna chu kum tina hman a lo ni ta a ni. He nî hi KNP pual ni pakhat anga hman tur ni lovin, tisa leh thlarauva naupangte zirtîr leh enkawl ṭhat pawimawhna inzirtîrna nî atâna hman tur a ni tih kohhrante’n hria ila. Inkhawmna leh function kan siamah erawh chuan a tam thei ang ber chanvo kan siamsak thiam a ṭha hlê ang.

**BIBLE PATHIANNÎ**  
**(December 3, Pathiann\$)**

**Thupui : Pathian thu, mihringte khâwnvâr.**  
**Sam 119:105**

December Pathian nê hmasa ber hi khawvêl-a kohhran pâwl hrang hrangin Bible Pathian Ni-ah kan hmang a. Anglican kohhran hi hmang hmasa an ni awm e. American Bible Society chuan kum 1915 ațangin Bible Sunday an lo hmang tawha hriat a ni. India rama Bible Society pawhin hun rei tawh tak ațang khân an lo hmang tawh a. Tun hma chuan Bible Society Sunday tia Calendar-ah chuantirin BCM pawhin kan hmang ve thin. Kum 2007 Assembly chuan Bible Sunday tiin a thlak ta a. He nê hi kohhran hrang hrangin Bible Society pual deuhin kan hmang tlangpui a. Hemi nêah hian Bible Society lo pian chhuah dân te, a thiltih leh tum te, tin, kohhran hote'n kan țanpui a, kan tel ve theih dân tur kawngte tarlangin inhrilh hriatna hunah kan hmang a; kan thawhlawm pawh Bible Society rawngbâwlna atân kan pe țhin a ni.

Bible Society hi Welsh rama hmeichhe naupang Mary Jones chuan kum ruk chhûng teh meuh Bible leina tur a tuak a, a tuak ngah veleh kum 15 mi a nihin Bible lei turin a kal, mahse a hralhtupa-in, '*Lei tur a awm tawh lo*' a tih avânga lungchhe taka țap ta mittui ațanga lo luang chhuak a ni, kan ti thei ang. Mahni puala Bible neih châk êm êm hmeichhe naupang kum ruk mi chu, mi ta chhiar



hawh turin an khaw thenawmah a kal fo thin a. Bible lei tura an khua atanga mêl 26 zeta hla Bala khuaah Bible lei tura kea a kal thu ngaihnawm leh lungchhiatthlak tak hi he khawvêla Bible zin kawnga thil thleng ropui ber ni ta chu a ni.

Bible hralhtu Pastor Thomas chuan chuti taka Bible duh leh ngainatu a han hmu chu a rilru a khawih êm êm a. Mi lei tawh sa a kawl chu a pe ta a. Chutah chuan he thu hi a tawp mai lo. A duh apiangte'n man tlâwm zawka Bible an lei theihna turin Bible chhutu pâwl (Society) din a nih theih nan hma a la ta a. Thahnemngai taka a beih hnuin, March 7, 1804-ah London Tavern (vantlang in)-ah mi 300 lai kalkhawmin British & Foreign Bible Society (BFBS) an din ta a ni. BFBS hnuaiah hian India ram chu February 21, 1811-ah Auxiliary pakhat niin, November 1, 1944-ah Bible Society puitlingah hlân a ni ta a. Mizoram pawh June 1, 1978-ah Associate Auxiliary niin, February 26, 1983-ah Auxiliary puitlinga hlân a lo ni leh ta a ni.

Bible Society hian thiltum pathum – 1) Pathian thu hi mi tin hnêna pêk tur a ni. 2) Mi tinin an hriat theih tur tawnga lehlin tur a ni. 3) Mite'n an lei theih tur tawka man tlâwma hralh tur a ni, tihte hi a ni. Bible Society hian tawng hrang hranga Bible lehlin hi a tum a nih avângin, chak taka chu hna chu a thawh theih nan leh chu hna pawimawh taka luhchilhtu kan nih theihna turin tawngtai leh sum hmangin nang leh kei hi awm hmunah kan lo tawng ve thei a ni.

## KRISMAS NÎ (December 25, Thawhtann\$)

Vawiin hi kum 2023 chhunga BCM Ni pawimawh kan hman hnuhnun ber tur a ni a. Vawiinah hian lei leh vana Lalber Pathian Fapa, min hmangaih avânga mihringa lo chang Isua Krista chibai buk turin kan thinlung buatsaih ila, rinnain Bethlehem lam i hawi theuh ang u.

Khawvel puma kristiante tâna hun hlimawm leh kan nghahhlelh ber ni chu Krismas hi a ni awm e. Isua pian nî thua hian chhut dân hrang hrang a awm avângin kan hman hun pawh a inang vek lova. Mahse a tam ber Protestant leh Roman Catholic kohhrante chuan December 25-ah hian kan hmang a ni. Krista lo pian nî tak hi hriat ni lo mahse, eng ni berah emaw chuan Isua hi a piang ngei si a. A taka thil lo thleng ngei a nih si avângin eng ni ber emaw kan hman hi thil sual a ni hranpa lo. Tin, Pathian lawm zâwng a ni ngei ang tih hriatna chu, hetiang taka ringtute thinlunga hmun a chang lian chho zel leh, sawi hleih theih loh malsawmna khawvêlin a dawnna huna a lo chang ta hi a ni. Khawvêl hmun tinah a tha lamin rah a chhuah nasa hlê a ni. Kan hnam zia leh khawsak phungte inang vek lovin, kan theih leh thiam zawngte inchen vek lo mah sela, Christmas Tradition hian midang tana hlimna thlena, thil tha intihsak tawna boruak a keng tlat a. Hei anga ni ropui leh hlimawm hi

khawvel p̄m huapah pawh sawi tur a awm lo reng reng a ni.

Hman lain December 25 n̄i tak hi ring lo mite'n Ni pathian biao kut ropui an hman n̄i a ni a. Amaherawhchu, kristiante'n Lal Isua pian lawmna n̄i (Krismas) at̄ana an hmanna chuan a rawn luahlan ta zawk a. Kristiante chuan thil tharte tichhuak zelin, he ni hian tisa leh thlarau lam hlawkna leh malsawmna thar a rawn hring chhuak tam tial tial a. A tira hmang duh lova nuaibo tuma beitu ringtu leh kohhran mite pawhin rawn zawm ve zelin, chin dân thar leh ṭha zawkte an rawn hmuchhuak zel a. Tiang chuan December 25 chu Isua pian n̄i ang taka hman chhunzawm z̄el a lo ni ta a ni.

December 25 Krismas nia hman hun hmasa ber chu AD 325-ah niin hriat a ni a. Hei hi Rom lal Constantine-a, kristian lo ni ta hun lai a ni.